

Communicaziun a las medias

Diversidad ed inclusiuin tar RTR

Cuiria, ils 19-04-2021 – **Radund 50% da nossa societad èn dunnas. Sch'ins sfeglia dentant ina gassetta, guarda in'emissiun da televisiun, in video u taidla ina contribuziun da radio ubain in podcast, vesa questa relaziun savens or auter. Umens èn per regla ils experts, han rollas activas e vegnan avant pli savens. Era tar RTR n'è quai betg bler auter. Quest fatg vules la chasa da medias rumantscha RTR ussa midar er en ses programs.**

Per midar quai ha RTR lantschè l'entschatta da favrer 2021 l'acziun interna «50:50» che sa basa sin in project da la chasa da medias publica BBC da la Gronda Britannia. La finamira è d'augmentar la cumpart da dunnas en ils formats da radio, televisiun ed online. Uschia noteschan las collavuraturas ed ils collavurats dal program da RTR regularmain quantas dunnas e quants umens ch'èn vegnids a pled en lur emissions u contribuziuns. Silsuenter vegnan questas cifras evaluadas e discutadas. Durant il mars mussa la statistica p.ex. la suandanta situaziun sur l'entir program RTR: 57% umens e 43% dunnas èn vegnidas a pled. La finamira è da cuntanscher a media vista in resultat equilibrà e persistent da 50% umens e 50% dunnas.

«Chattar dunnas che vulan s'exprimer avant la camera u avant in microfon n'è betg adina simpel en la lavur da mintgadi e dovra in engaschi ed in sforz supplementar da las collavuraturas e collavurats da RTR. Quel sforz vala dentant la paina per cuntanscher ina valor '50:50'», di Prisca Bundi, producenta Radio RTR.

Perquai elavura RTR actualmain ina glista d'expertas che facilitescha la tschertga da personas en situaziuns, nua ch'i sto ir svelt. Plinavant dat RTR paisa en il program, ma er en la comunicaziun a la lingua inclusiva ed a la diversidad.

Diversidad sin tut ils secturs

L'equiliber tranter umens e dunnas è dentant mo in aspect da la diversidad, auters èn per exempel differentas derivanzas, vegliadetgnas, genders, identitads ed orientaziuns sexualas, personas cun in impediment e personas da differentas religiuns. Da tractar insatgi auter pervia d'in tal aspect è inacceptabel. Uschia tematisescha RTR la diversidad en la populaziun sin tut ils chanals dal program. Quai per exempel cun la seria auditiva «[1.7 milliuns](#)», nua che personas cun in impediment stattan en il center, u era cun metter il focus sin tematicas sco quellas da [LGBTQ+](#). RTR prenda serius sia incumbensa en connex cun la diversidad, tant sco chasa da medias per la Svizra rumantscha sco era sco patruna da lavur. Per sviluppar vinavant nossa interpresa en direcziun da dapli diversidad, vegnan svilupadas cuntinuadamain mesiras cun questa finamira.

«Per mai è il tema diversidad fitg impurtant. Cura che jau tschertg personas per mias istorgias, less jau avoir ina variaziun tant pli gronda tge che pertutga idioms, schlattainas, vegliadetgnas e derivanzas. Quella ambiziun sforza da tschertgar protagonistAs ordaifer mia 'bubble' e quel sforz ha ina gronda plivalur per mia lavur, per mias emissions e la fin finala era per noss public.»

Livio Chistell, redactor social / moderatur Telesguard

Dapli infurmaziuns

RTR | Madlaina Niggli | tel.: +41 58 136 30 32 | e-mail: madlaina.niggli@rtr.ch